

OGM na Universidad di Aruba:

Un inversion den educacion semper ta paga cu miho interes



E programa Bachelor den Organization, Governance & Management (OGM) na Universidad di Aruba ta un estudio di tempo completo cu topiconan varia cu ta prepara su studiantenan pa drenta mercado labora.

Na aña 2009 Dios a bendiciona mi cu un bunita yiu muhe, Rayzianne Martis. Mi yiu muhe tabata mi motivacion pa mi studia na Universidad di Aruba. Mi a yega di traha varios caminda, prome y despues di a bira mama, y ma ripara cu ta hopi importante pa tin un diploma den bo man. Un estudio no solamente ta brinda oportunidadnan pa haya un bon posicion di trabou y un bon salario. Un estudio na nivel di bachelor tambe ta desaroya y eleva bo inteligencia academico y personal pa fungi como profesional den mercado laboral. Y si bo kier, tambe tin oportunidad despues pa sigui cu un estudio na nivel

di Master.

Na aña 2011 mi a termina HAVO y di biaha mi a dicidi pa sigui studia, y mi a aplica na Universidad di Aruba pa e bachelor programa di OGM. Durante mi prome 2 aña nan studiando OGM, mi tabata combina mi estudio cu un trabou part-time na Marriott Hotel. Den mi di tres aña mi a core stage na Deloitte como un assistant compliance officer. Deloitte a brinda mi e oportunidad pa trece den practica tur locual mi a siña durante mi estudio. E stage a bay hopi bon, y despues di a completa esaki Deloitte a ofrece mi pa keda traha part-time mientras mi ta finalisa mi estudio. Awe, mi falta solamente 2 luna pa mi logra mi titulo di Bachelor di OGM, y mi por bisa cu te awor esaki ta e miho inversion cu mi a haci den mi mes como persona. Despues di gradua sigur mi lo sigui pa mi Master, no tin nada mas dushi cu educa bo mes.

OGM ta un estudio na nivel

di bachelor cu ta dura 4 aña. Gran mayoria di e programa ta na Ingles y tin parti na Hulandes. Algun di e materianan cu nos ta haya ta: Perspectives on Organizations, Academic Reading and Writing, Teamwork and Group Dynamics, Governance, Policy and Organizations, Critical Thinking, Diversity, Disciplinary Approaches, Communication in Organizations, Strategic Management y Qualitative and Quantitative research. Y ainda tin mas. Durante e estudio aki nos ta lesa y uza hopi articulo y teorianan academico, pa nos haci investigacion, analisa e resultadonan y interpreta esakinan riba nivel academico. Pa motibo cu nos ta studiando aki na Aruba mes, varios di nos docentenan ta profesionalnan trahando den sector priva y sector publico. Nos ta analisa casonan local y internacional cu tin mester di nos atencion, of maneho cu mester wordo adapta na e necesidadnan di awendia, teniendo na

cuenta cu Aruba tin su mesun contexto, en comparacion cu Hulanda, Merca of otro paisnan grandi. Durante nos estudio, nos ta entrevista diferente departamento di gobierno y companianan priva, esaki ta depende cual topico bo grupo a scoge pa analisa. Den OGM nos ta analisa situacionnan, pero despues nos mester skirbi solucion pa nan tambe. Durante mi 4 ayanan di estudio, ami y mi grupo a haya oportunidad pa entrevista diferente personanan y organisacionnan, por ehempel na Parlamento di Aruba, SVB, SER, KIA, Bureau Leerplicht y companianan priva. Number y informacion cu nos ta colecta durante nos investigacionnan ta keda completamente anonimo, esaki tambe ta parti di e desaroyo profesional cu bo ta siña na OGM. Ami a scoge OGM pa motibo cu e ta un estudio hopi amplio y ta educa mi den mi ramo di interes y oportunidad pa trabou. E estudio di OGM nota uno facil,

e ta rekeri hopi disciplina, lesamento y dedicacion. Tin hopi trabou den grupo y esaki tambe tin su retonan, pero e ta un bon preparacion pa nos mercado laboral. E klasnan di OGM no ta grandi, y e docentenan ta dedica hopi tempo y atencion pa guia bo. E no ta facil pata mama, traha part-time y studia full-time OGM, pero imposibel tampoco e no ta. Ami a haci esaki pasobra esaki tabata mi meta, y ma bay pe. El a rekeri hopi sacrificio, y den mi caso mi mester a planea mi schedule hopi bon! Banda di tur esakinan, mi ta core cu e grupo Aruba Malmok Runners 5:00'am y mi ta haci crossfit 2 biaha pa siman atardi na Muscle and Lungs Crossfit Aruba. Ta hopi importante pa tin un bida balansada, esaki pa ami kiermen tempo pa educa bo mes, mantene bo curpa fisicamente saludabel y pasa tempo cu bo sernan keri. Tur esaki ta posibel cu sosten, amor y pasenshi di bo famia. □

Un proyecto unico pa nos centro di ciudad

Historia di Paardenbaai conta pa ocho cabay perdi den Oranjestad

Na november 2014 e artista Osaira Muyale a presenta na Minister Otmar Oduber e fantasia di cabay pa decora e paisahe di nos centro di ciudad. E artista ta hopi gradici na Minister Oduber pa a acepta e proyecto aki. "E ta un proyecto hopi bunita pa Aruba henter." Sra. Muyale ta splica.

Ta trata di 8 cabay ubica den espacio publico cu ta representa e historia di Paardenbaai den siglo 16. E ta reflesha e importancia cu Aruba tabatin promedio di e negoshi cu tabata tuma luga na Paardenbaai, cu a pone Aruba riba mapa e tempo ey caba. Cada un cabay cu su propio caracter y cu un nomber. Aruba tabata ricibi barconan for di islanan den Caribe, tambe

barconan di Latino America, pero tambe di Hulanda, Inglaterra, Portugal y te hasta Spaña.

E cabaynan ta reflesha e conexion cu nos isla tabatin for di e tempo ey caba y cu nos tin ainda cu mundo henter. A traves di e cabaynan aki cultura y historia ta uni. E



ta bira un pieza di discusion unda visualmente ta corda nos storia y nos por comparti tambe cu otro nan.

Pa e arte aki a scoge e material di fiber, cual ta ideal pa nos clima y mirando tambe cu Aruba siendo un isla rondona pa lama, tin un averahe halto di salo den nos aire. E ta un material duradero. A scoge e tono blauw pa reflesha e hecho cu e cabaynan aki a sali for di e awanan di Paardenbaai. Cada uno ta marca cu un simbolo cu ta conta visualmente nan historia.

Na final di juni cada un cabay lo keda instala na diferente luga den nos centro di ciudad. Minister Oduber a sigura cu arte den area publico no ta limita na e proyecto aki so. Lo tin mas na caminda. □



Historia di Paardenbaai reflesha den arte

Cultura y Historia ta haya nan posicion den infraestructura di nos centro di ciudad

Den e maneho cultural di nos pais, Minister Otmar Oduber kier a inclui mas arte den areanan publico. Un idea cu a sali for di e Cumbre Cultural Nacional.

For di aña pasa a inicia cu e proyecto Paardenbaai y awor ta yegando su etapa culminante. E proyecto ta reflesha e historia di Paardenbaai cual ta conoci pa tabata centro di ne-

goshi. Historia ta reflesha cu tabata netamente den e lama aki cu cabaynan tabata wordo benta for di barco y nan mes- ter a landa pa yega tera.

Minister Oduber ta comenta cu ta di aki e fantasia ta sali cu e cabaynan ta sali for di e awa cu color blauw y ta perde den nos centro di ciudad. Pa fin di juni e intencion ta pa nos mira algun cabay na diferente ubicacion den nos centro di

ciudad, cada cabay cu su spli- cacion pa trece un tiki mas di nos historia. Un creacion di e artista conoci Osaira Muyale.

Esaki ta un di e prome proyectonan cu ta den ple- no ehecucion bou di e capa di arte publico. Ta sigui cu uno na San Nicolas tambe cu ta un proyecto di domino. "Nos tur conoce San Nicolas den su epocanan y te dia di awe, domino tin un influen-

cia hopi grandi riba e bida di tur dia." Minister Oduber ta comenta.

Pa e proyecto di parti pariba di nos isla a scoge e artista Ryan Oduber. Tambe lo deco- ra henter e area unda antes tabata promenade cu dife- rente artistanan. Un Proyecto yama Murals caminda dife- rente pintornan riba nos isla combina cu muchanan ta bay pone un toke special den e

area di San Nicolas pa lo cual ta trata atraccionnan turistico. Ambos proyecto ta un com- binacion financia pa Aruba Tourism Authority y Mon- driaan Fonds di Hulanda. Arte den area publico no ta limita na e dos nan aki so. Minister Otmar Odu- ber ta comenta cu tin mas proyecto den preparacion pa decora e paisahe di Aruba cu lo cual ta nos historia y nos custumbenan. □